

স্মৃতি আহমেদ সাবের

স্মৃতিগুলো ধুলি হয়ে জমে যায় পরতে পরতে,
কালস্রোতে জমে উঠা সামগ্রীর মতো -
হারানো গল্পের বই, বিবর্ন খেলনা,
দাদার আমল থেকে ফেলে রাখা তোরঙ্গ তোষক,
পরিত্যক্ত হাঁড়িকুড়ি, কাপড়ের স্তুপ -
জমে, জমে, জমে.....।
ওস্তাদি ম্যাজিক বলে চলে যায় চোখের আড়ালে।
হারায়না তবে - ঠিক ওৎ পেতে থাকে।
কখন সুযোগ পেলে লাফ মেরে উঠে যাবে চক্ষের গোলকে।

সুখ জমে, দুঃখ জমে, হৃদয়ের গভীর গহনে।
অথবা জমতে থাকে মস্তিষ্কের অন্ধকার কোষে।

এমনওকি করা যায় যাতে, শুধু সুখ জমা হবে।
দুঃখেরা হারাবে যেন শরতের মেঘের মতন,
অথবা স্রোতের মত - হাতে নিয়ে এক মুখো যাত্রার টিকেট।
চলে যাবে, যাবে চলে, এবং হারাবে শেষে সাগরের বিস্তৃত বিশালে।

যেন আর কোন দিন ফিরে নাহি আসে।